

PÍTIUR

ATAKSHA papin áarar akupkamu

Pitiur Yus-shuaran áatramiania nu

1 ¹Wikia ju papin aajna ju Semuñ Pítruitjai. Jesukrístu akatramu asan ni takarniuríntjai. Ii Yusrí tura in Uwemtikramin Jesukrístu umirumna nuna atumniasha juna áatjarme. Niisha ashí áentsun métekrak enentáimtin asamtai atumsha iijíaj métek Niiniu ajasurme. Nuka ti penkeraiti. ²Yus, tura ii Uuntri Jesússha nékarmena nú núkap nekaki wéakrumin, Yuska atumin ti nukap yáinmaktatrum tura ti nekas imiatkinchanum pujustinian suramsattarme. Nuna nekaan tuke núnisan atí tusan wakerajrume.

Yusaj páchitkia atin

³Yus uunt asa tura ashí túramnia asa, umirtukat tusa achirmakuitji. Nii neka asar atsumajnia nu wáinkiaitji. Yus-shuarti wekasatniusha, tura Nin aneatniusha ii atsumajnia nuna Yuska kakaram asa suramsaitji. ⁴Niisha uunt asa tura tujinkiachu asa ni chichamen suramsaitji. Nu chichamsha ti kakarmaiti tura ti penkeraiti. Nu chichamjai atumsha atumí ayashí yajauch wakerana nuyá uwemprarum, Yusaj páchitkia átinian suramsaitrume. ⁵Yus umirkarme. Yamaikia juna túrataj tusarum kakartiniaitrume. Ti penker wekasatniuitrume. Nuyá Yusna nekaatniuitrume. ⁶Nuyá yayauch túrashtin íimiastiniaitrume. Nuyá katsuntratniuitrume. Nuyá Yus shiir enentáimtusrum wekasatniuitrume. ⁷Tura nuyá ashí shuar shiir enentáimtustiniaitrume. Tura nu nankaamas ashí shuar aneatniuitrume.

⁸Ashí nu túrakrumka, tura tuke túrukum wéakrumka, nakiarchattarme. Túrarum ni takatri émamkesrum takastatrum. Tura ii Uuntri Jesukrístu nekas nekaattarme. ⁹Tura nuna túruiniatsna nuka,

kusurua áanin áiniawai. Jesukrístu wakeramurin enentáimtuiniatsui. Ni tunaariya uwemprarmia nuna kajinmatainiawai. ¹⁰Tuma asamtai yatsurtiram, Yus atumin anaitiamak achirmakurmena nu tuke enentáimsarum wetarum. Túrakrumka penké iniarchattarme. ¹¹Tura ii Uuntri Jesukrístu uwentikramprajnia nu, Nii tuke akupeana nu, nakittsuk shiir awaintiamattarme.

¹²Tuma asamtai nékarminin tura Yusna nekas ana nuyá kanaatsrumnin tuke enentáimtikratjarme. ¹³⁻¹⁴Nekaatarum. Winia jákatniurun jeatema nuna ii Uuntri Jesukrístu ujakayi. Tuma asamtai iwiaaku pujajna juik atumin tuke enentáimpratarum tusan jintinratniuitjarme, tu enentáimsajai. ¹⁵Tura wi jakamtai, wi aajna juna tuke kajinmatkiirum tusan, wi jeajna nuna túrattajai.

Kristu waantu ajasun wáinkiarmlia nu

¹⁶Ii Uuntri Jesukrístu kakarmari tura ni táratniuri etserkamajnia nu, aya áentsnumia ántar chichamchauyi. Antsu imia ii jiija Uunt Jesukrístu waantu ajasu wáinkia asar ujakmajrume. ¹⁷Tura Apa Yus Jesukrístun shiir waantu awajsamia nu, ni imiá shiir pujutairiya chichaak tímiayi, “Juka winia ti aneamur Uchiruiti. Nin ti wararjai.” ¹⁸Iisha naint “Yusna” tájinia nu Niija pujá asar nu nayaimpinmaya chichaamu paant antukmaji.

¹⁹Tura nuna nankaamas ti nekasa nu, Yúsnan etserin yaunchu etserkarmia nusha nékaji. Ju étserma jusha, tsawant tsawaatsain kiritniunam ji keak tsáapin awajeana áintsan asamtai, penker enentáimta asarum penker túrarme. Tura Kristu taa, yankuam etsantea núnisan atumí enentáin ashí paant awajsattawai. Tura nu tsawant jeatsain nu étserma tuke penker enentáimtustarum. ²⁰Tura ju emka nekaatarum. Shuar aya ni enentáimmiariijain, Yusa Wakanijainchu, Yus-Chicham urukamtai tu chicháa nuna nekaatniun jeatsui. ²¹Warí, Yúsnan etserin yaunchu etserkarmia nu, aya ni wakeramuriijain tícharmiayi. Nu áishmankan enentáin Yus pujursarmiayi. Tuma asa ni tiarmia nuna Yusa Wakani jintintiam tiarmiayi.

Wait chichaman unuiniainia nu

(*Jut. 4-13*)

2 ¹Tura Israer-shuarnum wait chichaman etserniusha páchitkiarmiayi. Atumincha wait chichaman unuiniau páchitkia ártatui. Niisha awajimtikrampratniun wakeruiniak wáitian ti yajauchin uukar unuiniarartatui. Tura “Uunt Jesus uwentikrurmlia nusha ántraiti” tiartatui. Nuna takui ni amuukatniurisha wárik jeartiatui. ²Tura untsuri shuar ni yajauch túruiniamurin írsar métek túrawartatui. Iis, “Yus-Chichaman unuiniaitjai” tuíniayatanu imiá yajauch túruiniakui untsuri aents “Yus-

Chicham ánrtraiti” tiartatui. ³Kuítian ti wakeruinia ásar, wait chichaman unuitiamprar akíam kuítriniawartatui. Tura nú shuar yaunchu Yus jákatniunam sumamtkiawarma ásar, ni amuukatin tsawantri jeatemayi. ⁴¿Warí? Yuska ni suntari nayaimpiniam pujuarmia nunasha penké tsankurachmiayi. Antsu nayaimpinmaya jiniun akupkarmiayi. Tura nekapsatin tsawant jeatsain kiritniunam jinkiamu emetamu pujuiniawai. ⁵Yáunchuya shuarnasha Yus tsankurachmiayi. Antsu amuukarat tusa amaarkatniun akuptukarmiayi. Antsu aya Nuain, Yusjai wekasatniun etserin asamtai ni shuari siati armia nujai uwentikramiayi. ⁶Enentáimpratarum. Sutuma pépruncha tura Kumura pépruncha nayaimpinmaya jin akuptuk Yus mash amukmiayi. Aya yúnkunmik awajsamiai. Ukunam nu túrunamun nekaawar, shuar tunáa túratin tsúmainian nekaawarat tusa túramiayi. ⁷Tura Yus Ráutan uwentikramiayi. Péñker shuar asa, Sutumanmaya shuar imiá yajauch ásar tunáa túruiniakui, Raut kúntuts enentáimsamiayi. ⁸Péñker áishman asa, nuyá shuara yajauchirin wáitainiak, ni enentái péñker asamtai tuke tsawant kúntuts enentáimiuk wáitmiayi. ⁹Tura incha tunaan iniakturmakrin, nu tunaanum nupetnakchati tusa Uunt Yus uwentikrampramniaitji, ni umirka asakrin. Túrasha yajauch shuárnaka nekapsatin tsawant jeakui ti asutniáwarat tusa Yus yámaikikia apujeawai.

¹⁰Tura Yus akupeana nuna umirkatniun nakitrar ni yajauch wakeramurin túruinia nunasha Yuska nekas asutiáttawai. Enentáimcha áiniawai. Tura ni wakeramuriniak wakeruiniawai. Nijijai nankaamas akupin ainia nuna yajauch áujmatainiawai. ¹¹Warí, imia Yusa suntari Yusai matsatainia nu, nuna túratniun tsúmainiawai. Nankaamas kakaram tura nankaamas uunt áiniayat nu akupniun katsekainiatsui.

¹²Nu áishmansha enentáincha yajasma núnin áiniawai. Achikiar mantamnatniuk akiinia áiniawai. Enentáimtsuk nánkamsar yajauchin chichainiawai. Tuma ásar yajasma núnisan jákartatui. ¹³Chikichan wáitkiamia áintsan wáitsartatui. Tuke tsawant ni wakeramunak túruiniak “waraajai” tuiniawai. Tura atumjai irunar yurumáiniayatan atumin anankramawar warainiawai. Nuka natsantaiti.

¹⁴Nuwán wakerutskeka íniatsui. Tunaan yawetainiatsui. Yúpichuch ainia nú shuaran netse túratniun wakerumtkiainiawai. Kuítian wakeruktinnisha ti nékainiawai. Jákatniunam sumamawaru áiniawai. ¹⁵Yúsnumaaní naka wétsuk awajirarai. Peura uchiri Paraam Yúsnan etserniuiat yaunchu awajimia núnisan awajiniawai ju shuar. Paraamka tunaan tura, kuítian achiktinian ti wakerukmiayi. ¹⁶Tura niisha tunáa túratajtsa weai Yuska umpuurun chichachun aents chichaana nujai métek chichamtkiamiayi. Nuñkia umpuuru timia nujai Yúsnan etserin ni netse túratniurin enentáimiar iniaisamiayi.

¹⁷Nu áishmansha yumirmat kuyua núnis áiniawai. Tura núnisan yuranmisha kíariat nase umpuim menkaana nu, yumi ajuarcha ásar,

penké ántar áiniawai. Warí, Yus-Chichamjají áentsun yainiainiatsui. Niisha imiá kirit ámanum tuke pujustin áiniawai. ¹⁸Niisha ti chichainiyat ántar chichainiawai. Yajauch túratniujají tura ayash wakera nújajísha páchim túriarmia nuyá kanakiarua nú shuaran ataksha tunaanum ajuartajtsa wakeruiniawai. ¹⁹“Iiya núnis túrakrumka ankant áatrume” tu wénawai. Túrasha imia niníki ni tunaariin emetamu áiniawai. Páantchakait. Shuar warí tunaajajím nupetnaka, nuna emetamurínti. ²⁰Kame shuar, uunt Jesukrístu uwentikiartín ana nuna chichamené nekainiak ju nunkanam yajauch ainia nuyá uwempra ainia nu, tunáa nupetkam atak yajauchiniam iniainiakka, nuik pujumia nújajínkia naníkaamas yamáí imiá yajauch pujuiniawai. ²¹Yusa akupkamurín imiá péñkera nuna Yus nú shuarnasha súsarmai. Túrasha nekainiyat tunaanum waketkiaru ásar ti asutniáwartatui. Tuma asamtai, nekas jintia nekaachuitkiuníka maak árainti. ²²Tíchamukait, “yawá iyak ataksha yúawai,” tura, “kuchisha imiainiuitiat ataksha tsakusnum maajíkiimiui.” Nu áishmanísha núnisan yajauchiniam ataksha wáketainiawai.

Uunta tátintri

3 ¹Aneamu yatsurtiram ju papin jimiara áatjarme. Mai papinium winia jintintiamurjají atumí chamir enentáin enentáimtikratjarum tusan wakerajrume. ²Yúsnan etserin, péñker wekain armia nuna etserkamurí enentáimturarum. Tura ii Uuntri akupkamurín ni akatramuríjjají ujatmakarmia nusha enentáimpratarum. Jesukrístu uwentikrampramaj nuna chichamené tajai.

³Jusha emka nekaatarum. Amuamu tsawantin Yúsnan wishikin wantinkiertatui. Tura niisha ni yajauch wakeramurín túrusar wekasartatui. ⁴Tura juna tiartatui. “¿Krístuka “wi atak tátatjai” timia nusha urukuit? Warí, ii uuntri yaunchu kajiníkiarmia nuyá yapajíáchmaiti. Yus yaunchu ju nunkan najanamia nuyá yamaisha tuke núniskete” tiartatui. ⁵Túrasha nunkancha nayaimpincha Yus yaunchu najanamia nuna nekaatniun nakitiainiawai. Yusa chichamejají nunka entsaya jiiinkimiayi tura nunkasha entsá nanatrawai, Yus timia nujají métek. ⁶Tura ukunam nu nunkan amaarkamujají Yus emesramiayi. Ashí nuna nekaatniun nakitiainiawai. ⁷Tura Yus tiniu asamtai nayaimpisha nunkasha yamáíya nuka jijíají emesnarat tusa ikiusma áiniawai. Yus áentsun nekapsattana nu tsawantají yajauch aents emesnantatui; tura jisha nu tsawantají nunkancha nayaimpincha áesattawai.

⁸Tura jusha, aneamu yatsurtiram, enentáimsatarum. Uunt Krístujajínkia chikichík tsawant mir uwiya núniskete; mir uwisha chikichík tsawanta núniskete. ⁹Uunt Kristu, “atak tátatjai” tana nuna umitsuk menkakashtatui. Áyatik áentsti “wau taatsui” taji. ¿Urukamtai

wau taatsua? In áentstin nákarmaji. Shuar chikichkísha menkakaïn tusa nakitiawai. Antsu ashí shuar enentáin yapajíáwarat tusa wakerawai.

¹⁰Túrasha Uunta tsawantrí aya aneachma jeattawai. Kasa aya aneachma kiritniunam taana núnisan tátatui. Nu tsawantin nayaimpisha ipiamta núnis charáa timiatai menkakatawai. Tura nuí ashí írunka núruiuk esaawartatui. Tura nunkasha tura ashí írunka nusha esaawartatui.

¹¹Ashí nu emesnartin neka asarum atumsha imiá nekas Yus tuke enentáimtusrum, takamtsuk umirkarum wekasatniuitrume. ¹²Yusa tsawantrí wárik tati tusar, jintiá ímprusar nákastiniaitji. Nu tsawantái nayaimpisha esáa emesnartatui, tura ashí írunka núruiuk ti tsuer ajas entsamnattawai. ¹³Tura iikia yamaram nayaimpisha, yamaram nunkasha ati tusar nákaji. Nu átatui, tímiayi Yus. Tura nuísha aya péñkerak átatui.

¹⁴Nu tuma asantai, aneamu yatsurtiram, ju túrunati tusarum nákarmena nuí, imiatkinchanum wekasam chamir enentáimjái makuuchmin Yus wáitkiati tusarum wekasatarum. ¹⁵Ju nekaatarum. In uwentikramprataj tusa Yus ti nákarmaji. Ii aneamu yachi Páprusha núnisan Yus ni nekatairín susamia tímiatrusan áatramprarmame.

¹⁶Ashí papí aarmia nuí Pápruka wi tajana nuna chichaawai. Kame ni áarmarí chíkichka ishichik nekaachminiusha áiniawai. Nékachu ainia nú shuarsha, tura Yúsnum tariarcha ainia nusha Papru áarman yapajíáwar nusháa jintintiainiawai. Tura chíkich chichamsha Yus-Chichamnumiá ana nuna núnisan túruiniawai. Túmainiakka nínki emesmamainiawai.

¹⁷Wátsek, aneamu yatsurtiram, túruntsaïn ujakjarmena nu neka asarum, yajauch shuar anankramattsa wakerutmainiak awajimtikrurain tusarum, tura Yusai tariarurmena nuyá iniarajj tusarum anearum wekasatarum. ¹⁸Tura ii Uuntrí Jesukrístu in Uwentikkiartin ana nu, yamá nékarmena nú nankaamas nekaatarum. Tura enentáimin nú nankaamas tariarum wetarum. Yamaisha tura tuke, ii Uuntrí Jesukrístu náarin uunt awájsartí. Nu atí.